

ROMAMO ITE CRISTONA HNOTINOMO PABLO ORETAGA RABE

Romamo ite creyentiaimo Pablo cartana orede

¹ Romamo ite creyentiaï, omoï ðine cartana oredicue. Pablocicue. ¿Nigacino? Jesucristo ðibeimo maijïdicue. Jusiñamui fetocamiedicue. Ie mare rafuena cue lollena, cuena orede.

² Jusiñamuidi naimie facaina lloraini micoriaïdo bie rafuena jaie llote. Naimaci micoriaï iena jaie jiaï cueda. Iemona birui facacabidicaï.

³ Bie rafuedi Jusiñamui Jitona llote. Naimie jaie ite usumadi cai illaïma David micori.

⁴ Naimie Jusiñamui Jitonana uifnoticaï. Jusiñamui Joreñodi siño rafuedo caïna iena uifnotade. Jusiñamui Jito fiodaillamona, Jusiñamuidi ie Jitona jillotate. Jusiñamui Jitodi Jesucristo. Cai Nama.

⁵ Caïna duenaïllanona, caïna oretate, naga nairaïaïna naimïena ifnotallena, naimïena naimaci iobitallena.

⁶ Naimacimona itomoï. Naimïemo omoï duïllena, Jesucristo omoïna jai fetode.

⁷ Romamo ite creyentiaï, Jusiñamui isiruiganodomoï. Naimie isoï mareuidinona omoï illena, fetocanodomoï. Cai Moo Jusiñamui, cai Nama Jesucristo ðiga, omoïna duenaite. Iena uifnocana mai omoï jai. Iaimaïaï omoïna uri jai itatatiaïmaïaï. Iena omoï uifnocana mai omoï jai.

Roma ðine Pablo jaiacade

8 Diga comini, diga illanuaimo, Jesucristona omoi ñnuana jai fididimaci. Ie jira nano dofoconi omoi facaina Jesucristomo iobillacinona feaacadicue, Jusiñamuimo iena naimie fecallena.

9 Jusiñamuimo cue jñia, omoiñi jñidicue. Jusiñamui iena uiñote. Naimie Jito rafuena cue lluanona, cue comecimona naimiena sedadicue.

10 Jusiñamuimo cue jñia, naimiemo jicadicue, cuena canollena. Naimie jitaia, omoi dine ja muidomo cue riitdicue. Iena jicadicue.

11 Omoina eo cioacaducue. Jusiñamui Joreño uai cuemo illamona, omoi comeciaina ocuiñotaiacadicue.

12 Jesucristona omoi ñnuamona, naimiena cue ñnuamona, coninina cai comeciaina ocuiñotaiticai.

13 Cue amatiai, diga icaiño omoi dine jaiacadicue. Iena omoi uiñuana jitaidicue. Jaiacadicue; iadedi nia jainidicue. Cuemona Jesucristo rafuena cacajamona, dajerie jiaie nairaijai jai ñnotimaci. Omoi dine Jesucristo rafuena lluiacadicue, iena omoimona dajerie ñnollena.

14 Nana comini dine Jusiñamui oretagacue. Ie jira griego uaido ñaitinomo Jesucristo rafuena lloiacadicue. Griego uaido ñañedonomo iena jia lloiacadicue. Abina uiñotonomo iena jia lloiacadicue. Abina uiñoñedonomo iena jia lloiacadicue.

15 Ie jira omoimo Jesucristo rafuena eo lloiacadicue.

Jesucristo rafue siño

16 Jesucristo rafueri iobidicue. Naie rafuedi siño. Jusiñamuidi naga iena ñnotinona naimaci

jeacinomona jillotate. Judíuaidino nano iena cacadimaci. Ie mei judíuaiñedino iena jai cacadimaci.

17 Naie rafuemonona Jusiñamui caina feiñuana uiñotícaí. Jusiñamui caina marebicaitajana uiñotícaí. Naimiena cai ñnuamona iena uiñotícaí. Jusiñamui facaina lloraima micorí jaie cuega: “Jusiñamuina ñnuamona marebicaidimiedi Jusiñamui díbeimo ico jaca iite” cuega.

Comñni jeacinona fñoiadedi, dani naimaci muidona

18 Nana Jusiñamuina jitaiñedinodi naimie duere finollifue anamo jai itimaci. Iena uiñotícaí. Jusiñamui caina iena uiñotade. Maraiñede rafue naimaci finuanona, Jusiñamui ie uanaicinona jamaidimaci.

19 Jusiñamui naimacina naimiena uiñotaja muidona, imaci comeciainomona Jusiñamui illana uiñotimaci.

20 Enirue finua facaisemonona naimie finoca ramona naimie illana uiñotimaci. Naimiena cionidimaci; iadedi naimie finoca ramona naimiena uiñotimaci. “Naimiena uiñotimaci” omoi raia, naimiedi bu. Naimie uai jaca siñonana uiñotimaci. Ie jira: “Jusiñamuina uiñoñedícaí” rainidimaci.

21 Jusiñamui uiñotimaci; iadedi naimie uaina ñnoñedimaci. Naimiemo comeciaina facañedimaci. Naimiemo iobillacinona fecañedimaci; iadedi ebena comeciaina facacabidimaci. Naimaci comeciái jai tainomo ite isoide. Jai marebificaiñedimaci.

22 “Abina uiñotícaí” raitimaci; iadedi abina uiñoñedimaci. Jamai ebe isoidimaci.

23 Jusiñamui jaca ite. Naimie uai siño. Naimiena sedaacaiñedimaci; iadedi jiaie rana sedaacadimaci. Fiodairuide iimana eruaide jiraraina finodimaci. Ofomana eruaide jiraraina finodimaci. Ocainana eruaide jiraraina finodimaci. Jaiona eruaide jiraraina finodimaci. Naie isoide jiraraina sedauidimaci.

24 Ie jira Jusiñamui naimacina fainonocaide, naimaci jitailla jearede rafuena imaci finollena. Ie mei conini diga eo meirede rafuena finouidimaci.

25 Jusiñamui ie uanaicinona jitañedimaci. Uanañedicinodo jaidimaci. Jusiñamui finoca rari iobidimaci; iadedi naie rana finodimieri iobiñedimaci. Ero, dani Jusiñamuimo iobillacinona jaca cai fecacabillasa. Uanaicinona lloticue.

26 Iese naimaci illa jira, naimaci jitailla meirede rafuena finollena, Jusiñamui naimacina fainonocaide. Coniñona aifuedotimaci.

27 Naimaci jitailla jira, conimana aifuedotimaci. Naimaci marañede finoca rafuemona duere se-fullemona ibana feiñoitimaci.

28 Jusiñamuina naimaci uiñoiacaiñena jira, marañede rafuemo naimaci comeciai facallena, Jusiñamui naimacina fainonocaide. Naimaci finorainiga rafuiaina finocana jaidimaci.

29 Naga isoide marañedicinona finouidimaci. Naga isoide jearedicinona finouidimaci. Jiaie comini rana nicidoudimaci. Jiaie cominina duere finouidimaci. Jiaima raconi uradoisoidimaci. Cominina jaca meinetimaci. Fuiriruidimaci. Jifuerisoidimaci. Jiaie cominina jeare finouidimaci. Eo ñaillaredimaci.

³⁰ Jiaie comini joreñona ñaïoidimaci. Jusiñamuina jaca gaiñedimaci. Cominina jeare ñaïoidimaci. Abina iedouidimaci. Abina biriuidimaci. Diga jearede rafuemo comeciaina facauidimaci. Naimaci moo uaina ñnorainidimaci. Naimaci ei uaina ñnorainidimaci.

³¹ Ebena itimaci. Naimaci lloga uaina finorainidimaci. Jiaie cominina isiruirainidimaci. Naimacina jiai dueruirainidimaci. Iese jaisoidimaci. Iese nia jaicabidimaci.

³² Jusiñamuidi jiaie llote: “Bie isoide rafuena finodino iraimo jaca duere sefuitimaci. Cue illanomo jaca iñeitimaci” llote. Jusiñamui lluaana uiñotimaci; iadedi naie rafuena finocana jaidimaci. Iena jiaie comini finoiadedi, iobilanona, “Macai mare iese imaci finua” raitimaci.

2

Jusiñamuidi marañede rafuena finodinona duere finoite

¹ Ero, omoi judíuaimona damie comecina nibai facade: “Bie isoide marañede rafuena finoñedicue. Iena finuamona, jiaie comini Jusiñamuimona duere sefuitimaci. Cue duere sefuiñeiticue” raillamo naimie comecina facade; iadedi naie isoide marañede rafuena naimie finua jira, Jusiñamui naimiena jiai duere finoite.

² Jusiñamuidi uanaicinona uiñuamona, marañede rafuena finodimiena duere finoite. Iena uiñoticaí.

³ “Jusiñamui duere finollicino anamona jilloñeitimaci” comecina facadeo. Naimacimo o comecina o facaja isoi, naimaci isoi o finua jira, Jusiñamui ona jiai duere finoite.

4 Ona naimie duenaillamona, ona naimie duere finoacaiñellemona, o comecimo iticino marecinona meiduana naimie jitaide. Naimie dibeimo o illana naimie jitaide. Naiena jamaiño.

5 O comeci jaiarena jira, o comeci Jusiñamui dibeimo meidoiacaiñedio. Ie jira ico eo duere sefuitio. Ie ricailifuemona Jusiñamuidi nana naimiena inoñedinona duere finoite. Iena Jusiñamui finoia, Jusiñamuimona mare.

6 Nagamiai imaci finua ille dinori Jusiñamui naimacina duere finoite.

7 “Mare rafuena finocana jaidino cue illanomo jaca iitimaci” lloite. Naimaci naimie isoi ebire iacania, naimiemona iobillacino naimaci jitaia, naimie illanomo naimaci jaca iacania, iese Jusiñamui lloite.

8 Maraiñede rafuedo jaidino Jusiñamui duere finollicino anamo iitimaci. Dani imaci abina isiruitimaci. Uanaicinona inoñeditimaci.

9 Jusiñamui naga jeacinona finodimiena eo duere finoite. Judíuai comini ua duere finoite. Judíuaiñedinom cominina jiai duere finoite;

10 iadedi Jusiñamuidi naga mare rafuedo jaidimiena ebire itataite. Iobitaite. Uri itataite. Judíuaimo iese ua finoite. Judíuaiñedinomo iese jiai finoite,

11 naga nairaina daje isoi naimie finua jira.

12 Judíuaiñedinodi Moisés micori llogacino anamo ineditimaci; iadedi jeacinona naimaci finua jira, Jusiñamui naimacina duere finoite. Judíuai Moisés micori llogacino anamo itimaci; iadedi iena naimaci inoñena jira, jiai jaca daje isoi duere sefuitimaci.

13 Moisés micori llogacinona cacajamona, Jusiñamuimona jaca buna marebicaiñede; iadedi iena ñnuamona marebicaide.

14 Judíuaiñedinodi Moisés micori llogacino anamo ññedinacì; iadedi naimacì comecià; facajamona, marecinona finuana uiñotimacì. Marecinodo jaillana jiaì uiñotimacì.

15 Moisés micori llogacino anamo naimacì illa isoi, naimacì comeciàimona marecinona naimacì finoiadedi, iena uiñotimacì. Ie jira marañedicinona naimacì finoiadedi, iena jiaì uiñotimacì.

16 Biena llofuecabiticue. Ico Jusiñamui llua jira, Jesucristodi cominimo imacì comeciàimo iticinona juez isoi lloite. Marañedicinona finouidinomo duere finollicinona lloite. Marecinona finouidinomo duere finollicinona lloñeite.

Moisés micori llogacinodo judíuai comini raise jaiñedinacì

17 Abina iedeamona, omoimona damierie rait-omoi: “Judíuai imacìdìcaì. Moisés micori llogacino anamo caì illa jira, duere finollicinomona jilloitìcaì. Jusiñamui caì dìga ite” raitomoi. Iena omoi raillamona, abina iedotomoi.

18 Naimie jitailla rafuena uiñotomoi. Moisés micori llogacinona omoi uiñuamona, marecinona finuana uiñotomoi.

19 Jusiñamuina uiñoñedinona llofueiacadomoi. Naimiena naimacì uiñoñena jira, jitiñedinomo itimacì isoidimacì. Uanaicinona naimacìmo omoi lluamona, naimacì comeciàina lligaiñoiacadomoi. Naimacina uanaicinona uiñotaiacadomoi.

20 Jusiñamuina raise uiñoñedinona llofueiacadomoi. Naimacina abina uiñotaiacadomoi. Naimie rafuena nia raise uiñoñedinona llofueiacadomoi. Moisés micori llogacinomo nana uiñuacino illa jira, naiemo uanaicino illa jira, iese iacadomoi.

21 Jiaie cominina llofueiacadomoi; iadedi ¿niese omoi comeciaino fueoiacaiñedomoi? “Rana fiñeno” llotomoi; iadedi fiidomoi.

22 Omoi aiñede riño diga iñenana llotomoi; iadedi ie isoi finodomoi. Jusiñamuina eruaide jiraraina gaiñedomoi; iadedi naie ra illanuaimona naie jiraraina fiidomoi.

23 Moisés micori llogacinori abina iedotomoi; iadedi iena omoi ñnoñena jira, Jusiñamuina jeare finodomoi.

24 Iena Isaías micori jiaie cuete: “Omoi muidona judíuaiñedinodi Jusiñamuina jeare ñaitimaci” cuete.

25 Jusiñamui dibeimo jai omoi illana jiaie comini uiñollena, omoi abina detatatomoi. Moisés micori llogacinona omoi ñnoiadedi, omoi abina detatajadí mare; iadedi naicinona omoi ñnoñenia, abina detatañedino isoi jai itomoi. Jusiñamui dibeimo iñedomoi.

26 Moisés micori llogacinona judíuaiñedino ñnoiadedi, naimaci abina detatañenia, Jusiñamuimona naimie dibeimo ite judíuai isoidimaci; iadedi abina detatañedimaci.

27 Moisés micori llogacinuaina uiñotomoi. Omoi abiaina detatatomoi; iadedi Moisés micori llogacinona judíuaiñedinodi ñnua jira, Moisés micori llogacinuai omoi ñnoñena jira, Jusiñamuimona omoi baifemo uaidimaci.

28 Omoi jeiciamona Jusiñamui ua cominiñedomoi.

Omoï abiaïna detatajamona, Jusiñamui ua cominiñedomoï;

²⁹ iadedi omoï comeciaï marena illamona, Jusiñamui ua cominidomoï. Abi detataja jira, Jusiñamui cominiñedomoï; iadedi omoï comeciaï marena illa jira, Jusiñamui cominidomoï. Raise naimiena ñnotinodi cominimona iobillacinona feiñuana jitañedimaci; iadedi Jusiñamuimona iobillacinona jitaïdimaci.

3

¹ Bie cartana omoï feiñuanona, iena facallemona, damierie comecina facaite: “Judíuaidicai; ia naiemona, ¿ñiese jiaïe comini baifemo faiticai? Cai abiaïna detataticai; ia naiemona jaca buena oñedicai”.

² Ie jira omoïmo lloiacadicue: “Judíuaina cai illana eo mare”. Jusiñamuidi danï caïmo ie rafuena llote. Jiaïe cominimo lloñede.

³ Cai cominimona dajerie Jusiñamui rafuena ñnoñedimaci; iadedi Jusiñamuidi ie lloga rafuena jaca finode.

⁴ Comini tainona llotimaci; iadedi Jusiñamuidi uanaicinona jaca llote. David micori iena jaie llote:

O lloga uaimona uanaicinona o llouillana uiñoticaï.

O finoca rafuena jiaïe comini uaitaia, o dinena jaca anafenodio.

Iena uiñoticaï.

⁵ Dane damierie comecina facaite: “Jusiñamuidi mareuidimie. Cai baifemo uaide. Cai marañedicinona cai finuamona caina Jusiñamui jitaia, jiaïe cominidi Jusiñamui jaca mareuillana

uiñoitimaci. Cai illa muidona Jusiñamuina iese uiñoitimaci. Ie muidona naimiedi cai jeacino facaina caina duere finoñena, jiaie cominina naimiena cai uiñotaja jira”. Omoimona iese dajerie comeciaina facadimaci;

⁶ iadedi iese iñede. Cai jeacino facaina caina duere finoñeniadedi, Jusiñamuidi jiaie cominina jiai duere finonite.

⁷ Taino cue lloia, iena naimie oni dotaia, naimiedi mare rafuena finuana cominidi uiñoitimaci. Ie mei naimiemo iobillacinona fecadimaci. Ie muidona Jusiñamui cue jeacino facaina cuena duere finoñena.

⁸ Omoimona dajerie cuena ñaitimaci: “Bimie raite: ‘Jusiñamui marecinona finuana raise cai uiñollena, marañedicinona finocana cai jailla’ ”. Iese cue lloñena jira, Jusiñamui naimacina duere finoia, cuemona mare.

Jeacinona nana cai finodica

⁹ Judíuaidicai; iadedi jeacinona nana comini finua jira, jiaie nairai baifemo faiñedicai. Judíuaidicai; iadedi jeacinona finodica. Judíuaiñedinodi jeacinona jiai finodimaci.

¹⁰ Jusiñamui facaina lloraini micoriai iena jiaie cuete: Marebicaidino jaca iñede. Nana comini marañedimaci.

¹¹ Jaca buna Jusiñamuina raise uiñoñedimaci. Naimiena raise uiñoiacañedimaci.

¹² Mare rafuedo nana jaiñedimaci. Marañedicinona finoidimaci.

Jaca buna marecinona finoñedimaci.

¹³ Jeare ñaicabitimaci. Tainona llocabitimaci.

Naimaci ñaiamona diga jearede rafue comuicabide.

¹⁴ Naimaci fuiái eo borede.

¹⁵ Icirillamona jiaie cominina raire meinetimaci.

¹⁶ Níne naimaci jaia, diga marañede rafuena comuitatimaci.

¹⁷ Uri illana uiñoñedimaci.

¹⁸ Jusiñamuina jaciruiñedimaci jaie iese cuete.

¹⁹ Jusiñamui facaina lloraini micoriai lloga uaidi naie lloga uai anamo itinomo duide. Naie lloga uai naimaci uiñuamona, dani abi imaci riidolle uai iñede. Nana comini Jusiñamui duere finollicino anamo itimaci. Iena uiñotícaí.

²⁰ Moisés micori lloga uaina #nuamona, Jusiñamui jitailla isoi, jaca buna marebicaiñeite; iadedi naie lloga uaina cai uiñuamona, jeacinona cai finuana uiñotícaí.

Jesucristona cai #nuamona jillobidícaí

²¹ Jusiñamuidi birui caina marebitatajana jai uiñotade. Moisés micori lloga rafuedo iena birui uiñoñedícaí; iadedi Moisés micori iena jaie llote. Jusiñamui facaina lloraini micoriai iena jiai llotimaci.

²² Jesucristona cai #nuamona, Jusiñamuidi caina marebicaitate. Nana Jesucristona #notinona marebicaitate. Nie isoide cominina cai ia, caina marebicaitallena, caina daje isoi feiñoite.

²³ Nana caidi jeacinona finodícaí. Jusiñamui caina jitailla isoi, marena iñedícaí.

²⁴ Caina naimie duenaillamona, naimie jitailla jira, Cristo Jesúsna cai #nuamona, caina marebicaitate.

25 Jesucristo nia biñena facaise ite cominimo jeacino facaina Jusiñamuidi ibana oñede. Naimaci jeacino facaina Cristo Jesús fiodaillena, cai facaina naimie fiodaillena, Jusiñamui naimiena oretate. Naimiena birui cai ñnoia, caina duere finoñeite. Jusiñamuina mareuidimiena uiñoticaí.

26 Naimiena iese oretajamona, Jesúna ñnotimiena Jusiñamuidi marebicaitaja jira, Jusiñamuina mareuidimiena uiñoticaí.

27 Cai jeacinomona marena cai illena, buena finoñedicaí. Ie jira cai finuamona abi iedoñedicaí. Buena finoñedicaí; iadedi Jesucristona cai ñnuamona, jillobidicaí. Ie jira cai finoca rafueri abina iedoñedicaí.

28 Moisés micori lloga uaina cai ñnuamona, marebicaiñedicaí; iadedi Jesucristona cai ñnuamona marebicaidicaí.

29 Jusiñamuidi dani judíuai imaci Mooñede; iadedi naimiedi nana comini imaci Moo.

30 Cai Moodi jaca damiena jira, naimiena naimaci ñnua jira, judíuaina marebicaitate. Naimiena naimaci ñnua jira, judíuaiñedinona jiai marebicaitate.

31 Cai ñnuamona cai marebicaila jira, Jusiñamui facaina lloraini micoriai jaie lloga uaina caitañedicaí; iadedi iena ua ñnocana jaidicaí.

4

Abraham micorimona fueoticaí

1 Abraham micori rafuena ja ñaiacadícue. Naimie marebicaillafuena omoimo lloiacadícue.

2 Ie finoca rafuemona naimie micori marebicaidena, naimie micori abina iedote;

iadedi ie finoca rafuemonu naimie micori marebicaiñede. Ie jira Jusiñamuimona naimie micori abina iedoiacaiñede.

³ Iena Moisés micori jaie cuega: “Jusiñamuina Abraham micori inua jira, Jusiñamuidi naimie micorina jeacinona jaca finoñedimiena isoitate. Naimie micorina marebicaitate” cuega.

⁴ Maijillena buna damie ocuiadedi, ibajana jamai fecañeite; iadedi maijia facaina fecaite.

⁵ Ero, ie maijiamona jaca bu jeacinona jaca finoñedimiena isoicaiñede. Jusiñamuina naimaci inua jira, Jusiñamuidi marañedinona marebicaitate.

⁶ Bie rafuena David micori jiai jaie cuega: Ie maijiamona bu marebicaiñena jira, Jusiñamui marebicaitagamiedi iocire iite.

⁷ Naimaci marañedicinona Jusiñamui dotajamona, iocire iitimaci.

Jusiñamui naimaci jeacinona dane abido ietañeite.

⁸ Naie jeacinomo Jusiñamuidi comecina dane facañeite.

Naimiedi jai feitaite.

Ie jira iocire iitimaci.

⁹ Dani abina detatatino iocire illena lloñede; ia abina detatañedinomo iena jiai llote. Jusiñamuina Abraham micori inua jira, Jusiñamui naimiena marebicaitate.

¹⁰ Naimie micori abina nia detatañenia, naimie micori marebicaide.

¹¹ Naimie micori marebicaila mei, Jusiñamui dinena Abraham micorimo abi detatajana llote. Abraham micori ie abina detatajamona, Jusiñamuina naimie micori inuana uifoticaí. Ie abina detatajamona, judío imiena jai jaide;

iadedi Jusiñamuina ñnuamona, naimie micori marebicaide. Ie jira Abraham micoridi nana Jusiñamuina ñnotino moo. Nana comini abiaina detatañedimaci; iadedi naimaci ñnua jira, Jusiñamui naimacina marebicaitate.

¹² Cai comini abiaina detatatimaci; iadedi cai moo Abraham micori isoi naimaci ñnua jira, Abraham micori isoi marebicaidimaci. Ie jira Abraham micori nana naimaci moo.

Abraham micori ñnuamona, Jusiñamui lloga uaidi suide

¹³ Abraham micorimo Jusiñamuidi: “Nana enirue omo iiticue” llotte. “O uruiaimo iena jiai iiticue” llotte. Moisés micori llogacinona Abraham micori ñnua jira, iese Jusiñamui lloñede; iadedi Jusiñamui lloga uaina Abraham micori ñnua jira, iese Jusiñamui llotte. Abraham micori ñnua jira, Jusiñamuidi naimiena marebicaitate.

¹⁴ Moisés micori lloga uaina ñnotinomo: “Nana eniruena omoimo iiticue” Jusiñamuidi llotena, Jusiñamuina ñnotino tainona ñnotimaci. Jusiñamui lloga uai jiai jai saide; iadedi iese iñede. Dani naimiena ñnotinomo: “Nana eniruena omoimo iiticue” llotte.

¹⁵ Moisés micori lloga uaina naimaci raise ñnoñenia, Moisés micori lloga uaido jaidino Jusiñamui ricailifue anamo itimaci; iadedi Moisés micori lloga uai iñedena, Jusiñamuimona buna duere sefuiñeite.

¹⁶ “Eniruena omoimo iiticue” naimiena ñnotinomo Jusiñamuidi llotte. Duenaillamona llotte. Nana Abraham uruia micoriaimo iena llotte. Dani Moisés micori lloga uaido jaidinomo

lloñede; iadedi Abraham isoi ñnotinomo jiai llote. Abraham micori isoi cai jailla jira, naimiedi cai moo.

¹⁷ Jusiñamui iena jaie llote: “Ona diga nairai imaci moona jai itataitacue” llote. Jusiñamui fiodaitinona jilloitarede. Nia iñede rana ie uaido jiai comuitate. Ie jira Jusiñamui Abraham micorimo llua isoi, suide. Jai fiodaitino illa isoi Abraham micori abi illa jira, Jusiñamui naimie abina mairitate. Ie ai oñiñomo urue comuillena llote.

¹⁸ Jusiñamui Abraham micorimo jiai llote: “Ailluena uruiai omo iite. Diga nairai omona jebuite” llote. Abraham micoridi naie ñnorainiga rafuena ñnote.

¹⁹ Jaca ñnote; iadedi cien años naimie micorimo illamona, naimie jai eeiroma. Naimie micori aidi, Sara micoridi, oñiñona jira, naiñaiño uruedi comuiñede.

²⁰ Abraham micoridi Jusiñamui llua ñnote. ñnocana jaillano, iobillacinona Jusiñamuimo fecade.

²¹ Abraham micoridi Jusiñamui lloga uaina finuana eo ñnote.

²² Ie jira Jusiñamui naimiena marebicaitate.

²³ Naie rafue jaie cueba; iadedi dama Abraham micorimo duiñede;

²⁴⁻²⁵ iadedi caimo jiai duide. Jusiñamuina ñnotinona marebicaitate. Cai Nama Jesús fiodaillamona, Jusiñamuidi naimiena jillotate. Cai jeacino facaina fiodaite. Caina marebicaitallena, naimiena jai jillotate.

5

Jai cai marebicaidicai

1 Jusiñamuina cai ñnuamona cai marebicailla jira, Jusiñamui ðiga uri iticai. Cai Nama Jesucristo finoca rafue muidona, Jusiñamui ðiga uri iticai.

2 Jesucristo muidona Jusiñamui caina duenaillamona, caina marebicaitate. Naimie ebirena isoi cai illemo caimare ocuiridicai;

3 iadedi duere cai sefuiadedi, jiai iobidicai. Duere sefuillamona, cai comeciai ocuiñocana cai jaillana uiñoticai.

4 Cai comeciai ocuiñuamona facacifidicai. Facacifillamona, Jusiñamuimo ocuiridicai.

5 Jusiñamui caina isiruilla jira, tainomo ocuirinaiticai. Ie Joreñona caimo fecade. Ie Joreño cai comeciammo illa jira, ie Joreñodo Jusiñamuidi caina naimie caina isiruillana uiñotade.

6 Cai jeacinomona dani jillonidicaimo, Cristo cairi fodaite. Maraiñedicai; iadedi naie facaiseconi cairi fodaite.

7 Maraiñedimie facaina caimona jaca buna fi-daiacaiñede. Caimona nibai damie maremie facaina fodaite; iadedi nana comini iese fi-daiacaiñedimaci. Maraiñedimie facaina jaca buna fi-daiacaiñede;

8 iadedi nia maraiñedicaimo, Jusiñamui caina isiruillamona, Cristo cairi fodaite.

9 Cristo cairi fi-daillamona, jai marebicaidicai. Ie muidona Jusiñamui caina duere finuacinomona Cristodi caina jillotaite.

10 Cai ðinena Jusiñamuina cai enoilla facaiseconi naimie Jito cairi fi-dailla muidona, ie Jito jillua muidona, Jusiñamui caina jai nabaide. Naimie caina nabailla jira, cai ico jilloillena raise uiñoticai.

11 Cai Nama Jesucristo muidona, Jusiñamui iobidicai. Cristo muidona Jusiñamui ðiga uri iticai.

Adán micorî finoca rafue

12 Bie rafue jai suide. Adán micorî jeacinona finuamona, nana caimo jeacînodî jai comuide. Jeacîno caimo illa muidona, cai jeacîno ite dîga nana fiodaicana jaidîcai.

13 Moisés micorî llogacîno nia îñenia, jeacinona finodîmacî; iadedî Moisés micorî llogacîno nia îñenia, Jusiñamuidî jeacîno facaina îbana oñede.

14 Moisés micorî llogacîno nia îñenia, Adán micorî facaisemona Moisés micorî facaisemo naimacî jeacîno ite dîga nana comîni fiodaicana jaidîmacî. Adán micorî isoi jeacinona finoñedîmacî; iadedî fiodaicana jaidîmacî. Adán micorîdî Cristo isoiñede. Adán micorî finoca rafuemona jeacîno comuide. Cristo finoca rafuemona Jusiñamui cai jeacinona oni dotade.

15 Adán micorî finoca rafuedî Jusiñamui finoca rafue isoiñede. Adán finoca rafuemona cai jeacîno ite dîga nana cai fiodaicana jaidîcai; iadedî Jusiñamui finoca rafue Adán micorî finoca rafue bai femo faite. Jusiñamui jitailla jira, caina naimîe duenaillamona, cai dîne Jesucristona orede, nana cai jilloillena.

16 Dama Adán micorî jeacinona finuamona, Jusiñamuidî nana caina duere finollicîno anamo itatate; iadedî Jesucristo fiodaillamona, Jusiñamui jitailla jira, caina marebicaitate. Ailluena jeacinona finodîcai; iadedî marebicaidîcai.

17 Dama Adán micorî jeacinona finuamona, cai jeacîno ite dîga nana cai fiodaicana jaidîcai. Jusiñamui caina eo duenaillamona, Jusiñamui caina marebicaillamona, dama Jesucristo muidona, Jusiñamui dîga jaca îitîcai.

18 Dama Adán micorí muidona, nana comini duere finollicino anamo itimaci; iadedi dama Jesucristo finoca mare rafuemona Jusiñamui diga naimaci jaca illena, nana comini marebicairedimaci.

19 Adán micorí Jusiñamuina ñnoñenamona, nana comini jeacinona finodimaci. Jesucristo Jusiñamuina ñnuamona, ailluena comini marebicaitimaci.

20 Jusiñamui Moisés micorimo rafuena llote. Iena comini ñnoñenamona, diga jeacinona naimaci finuana uiñotimaci. Jeacinona finocana jaidimaci; iadedi Jusiñamuidi naimacina eo duenaite.

21 Jeacino anamo jaie nana cai illa jira, cai jeacino ite diga fiodaicana jaidicai; iadedi Jusiñamui duenaillacino anamo birui iticai. Ie jira cai marebicaillamona, cai Nama Jesucristo muidona, Jusiñamui diga jaca iiticai.

6

Jesucristomo cai duillamona, jeacino anamo jai iñedicai

1 Jeacino anamo jai iñedicai; iadedi omoimona damierie comecina facaite: “Naga icaiño jeacino cai finoia, caina Jusiñamui duenaillamona, cai jeacinona oni dotade. Naimie caina duenaicabillana raise cai uiñollena, jeacino eo finocana jaiticai. Iemona cai jeacinona oni dotajamona, naimie caina duenaillana eo raise uiñoiticai”.

2 Iese comecina facaño. Jeacino anamo jai cai iñena jira, jeacinona finocana cai jaiñena.

³ Biena uifnotomoi. Cristo Jesús dibeimo cai illamona, nana caidi bautizagacai. Cristo fodailla jira, cai comeciaino ite jearedicino anamo jai ifnedicai.

⁴ Cristo fodailla jira, raiafomo naimiena jonetimaci. Cristo fodaillamona ie Moo uaido jillode. Naimie dibeimo cai illamona, cai jeacino anamona jillodicai. Cai comeciaino jiaie rafue birui illa jira, jiaie rafuedo jai jaidicai.

⁵ Cristo fodaite; iadedi naiemona jillode. Naimie dibeimo cai illanona, cai comeciaino ite jearedicino anamona cai jillua jira, Cristo ie mare rafue anamo birui iticai.

⁶ Cristo fodailla jira, cai comeciaino ite jearedicino anamo jai ifnedicai. Caimo jai jainaiaifnena jira, jeacino finocana cai jaiifnena.

⁷ Jeacino anamo jai cai ifnena jira, jeacinona finocana cai jaiifnena.

⁸ Cristo fodaite; iadedi jillode. Naimie fodailla jira, cai jearedicino anamo jai ifnedicai. Naimie jillua jira, jiaie rafuedo birui jaidicai.

⁹ Fodaillamona Cristo jillua jira, naimiedi dane fodaiifneite. Naimie fodaitemo, cai jeacino facaina naimiedi jai fodaite. Jai dane fodaiifneite.

¹⁰ Jeacino facaina jeacinona oni dotallena, naimie dacaiño fodaite; iadedi ie Moona jaca iobitajanona, naimie ie Moo dibeimo jaca iite.

¹¹ Ie jira jeacino anamo ifnenanomo omoi comeciaina faca. Cristo Jesús dibeimo jai omoi illanona, Jusiñamui jitailla rafuena finollemo omoi comeciaina faca.

¹² Jeacinona finocana jaiifneno. Omoi comeciaino jeacinona finoacania, iena ifnoñeno.

13 Jeacinona omoï finoñellena, omoï comeciaina ocuiño. Mare naimie jitaillacinona omoï finollena, Jusiñamuina ñno. Jeacino anamo jaie omoï illa jira, naimiemo omoï nia duiñena jira, Jusiñamuimona fiodaitino isoidomoï; iadedi jeacino anamo birui omoï iñena jira, naimiemo omoï jai duilla jira, Jusiñamuimona fiodaillamona jai jillodino isoidomoï. Jaie naimiemo duiñedomoï; ia birui naimiemo jai duidomoï.

14 Moisés llogacinuai anamo omoï jai iñena jira, jeacino anamo jai iñedomoï. Jeacinona finocana omoï jaiñellena, Moisés micori llogacinodo jaiñedomoï; iadedi jeacino omoï finoñellena, omoïna Jusiñamui duenaillamona, naimie omoïna birui canocabide.

Patrón anamo itinomona cai fueolle

15 Moisés micori llogacino anamo jai iñedicaï; iadedi omoïmona damierie comeciina facade: “Moisés micori llogacino anamo cai iñenamona, jeacino cai finoia, Jusiñamui caina duere finoñeite”. Iese comeciina facañeno. Jeacinona finocana cai jaiñena.

16 Biena uiñoticaï. Patrón anamo bu ia, ie patrón comeci jitailla rana finode. Ie ocuica rana ñnote. Ie isoide. Jeacino anamo omoï ia, jeacinona finocana jaidomoï. Jeacino omoï finuamona omoï jeacino ite diga fiodaicana jaidomoï. Ie jira Jusiñamui illanomo ico iñeitomoï. Jusiñamui anamo omoï ia, Jusiñamui jitailla rafuena finocana jaidomoï. Naimie illanomo ico iitomoï.

17 Jeacino anamo jaie itomoï. Iemei omoïmo jiaie comini Jesucristo rafuena jai llotimaci. Iena caca-

janona, iena raise ñnotomoi. Ie jira Jusiñamuimo iobillacinona fecadícue.

¹⁸ Jeacino anamona jai jillobillamona, marecinona finocana jai jaidomoi.

¹⁹ Cue llwana omoi raise cacaillena, bie isoide rafuena llotícue. Omoi comeciai raila jira, jeacinona navui finodomoi. Maraiñedicinona finocana navui jaidomoi. Cristo ðibeimo omoi jai illa muidona, marecinona omoi finocana birui mai omoi jai. Iese omoi jaillamona, omoi comeciai Jusiñamui jitailla isoi marena iitomoi.

²⁰ Jeacino anamo navui omoi ia, Jusiñamui jitailla isoi, marecinona finoñedomoi.

²¹ Jeacinona navui omoi finuamona mare rafuena oñedomoi. Ie jira iena birui meiruitomoi. Jeacinona finocabidino fiodaillamona, Jusiñamui illanomo ico iñeitimaci.

²² Jeacino anamona jai jillobidomoi. Jusiñamui anamo omoi jai illa jira, naimie ocuica rafuena finodomoi. Iena omoi finuamona, Jusiñamui jitailla isoi, marecinona finocana jaitomoi. Ja muidomo naimie ðiga iitomoi.

²³ Jeacinona finocana omoi jaia, omoi jeacino ite ðiga fiodaitomoi. Jusiñamui illanomo ico iñeitomoi; iadedi cai Nama Jesucristona omoi ñnuamona, Jusiñamuidi omoina jaca itataite. Naimie illanomo ico iitomoi.

7

Inirede riñomona cai fueolle

¹ Cue amatiai, Moisés micori llogacinuaina uiñotomoi; iadedi iena nia raise cacaiñedomoi. Ie fiodailla mei, jaca buna Moisés micori llogacinuai

anamo iñede. Ie fiodailla mei, jai iñena jira, nainomo duiñede.

² Ie isoide. Nana naimie ille dinori, ñirede riño ie ñimo duide. Iese Moisés micori jaie llote. Ie ñi fiodailla mei, ie ñimo jai duiñede. Naimie anamo naiñaiño jai iñena jira, jiaimiena naiñaiño oia, ie ñina illena, Jusiñamuimona mare.

³ Ie ñi nia fiodaiñenia, jiaimie diga naiñaiño ia, ie ñi abimo jeacinona jai finode, Moisés micori lloga uai naiñaiño ñnoñena jira. Ie ñi fiodailla mei, naimie anamo naiñaiño jai iñena jira, jiaimiena ie ñino naiñaiño oia, jeacinona jai finoñede.

⁴ Ie isoide. Cristo fiodailla jira, Moisés micori llogacinuai anamo jai iñedicaí. Iemo jai duiñedicaí. Ie jira Cristomo jai duidicaí. Jusiñamui jitailla rafuena finocana cai jaillena, fiodaillamona Cristo jai jillode.

⁵ Jusiñamuina nia cai ñnoñenia, cai jitailla rafuena finocana jaidicaí. Moisés micori llogacina uñoticaí; ia cai maraiñede jitailla rafuena finocana jaidicaí. Cai jeacino ite diga fiodaicana jaidicaí;

⁶ ia Moisés micori llogacino jai saide. Caímo jai duiñede. Navui ie anamo iticaí; iadedi birui ie anamo jai iñedicaí. Jusiñamuina cai sedajamona, Jusiñamui Joreño rafuedo jai jaidicaí. Moisés micori ciegafuiaido jai jaiñedicaí.

Cue comecimo ite maraiñedicino

⁷ “Moisés micori llogacino maraiñede” lloñeíticaí; iadedi naie llogacino iñedena, jeacinona uññoñedicue. Jiaimie mo ite rana cue ñicidua na maraiñenana jaie uññoñedicue. Moisés micori jaie

llote: “Jiaimie mo ite rana nicidoñeno” llote. Ie jira naiemona niciduanana maraiñenana uiñoticue.

⁸ Naie llogacino muidona cue comeci jeacinona finoacade. Ie muidona rana nicidotiecue. Naie llogacino iñedena, jeacino finuana uiñoiacaiñedicai. Naie llogacino iñedena, jeacino anamo iñedicai.

⁹ Moisés micori llogacinona nia cue uiñoñenia, caimare uri itiecue. Naiena cue uiñuamona, jeacino cue finuana uiñoticue. Ico Jusiñamui diga cue iñenana uiñoticue.

¹⁰ Nano cue comecina facadicue: “Naiedo cue jaillamona, Jusiñamui diga ico jaca iitiecue”. Iese cue comecina facadicue; iadedi naie llogacinona cue uiñuamona, Jusiñamui dibeimo cuena jaca itatañede.

¹¹ Naie llogacino muidona cue comeci jeacinona finoacana jira, cue jitailla rafuena oñedicue. Ico Jusiñamui diga jaca cue illena oñedicue; iadedi duere cue sefuillicinona otiecue. Naimie dibeimo Moisés micori llogacino cuena itatañede; ia naimie dibeimona cuena itatate.

¹² Iese ite; iadedi Moisés micori llogacinodi mare. Jusiñamuimona ite.

¹³ Naie llogacino mare. Naie rafue muidona fioidañeiticue; ia jeacino muidona fioidaitiecue. Jeacinona cue finua jira, Jusiñamui illanomo ico jaca iñeiticue. Naie mare llogacinomona jeacino cue finuana eo maraiñenana uiñoticue.

¹⁴ Jusiñamui Joreño Moisés micorina naie llogacinona cuetatate. Ie jira naicino mare; iadedi cue jitailla rafuena cue finua jira, cuemo jeacino illa jira, jeacino finoraimana itiecue.

¹⁵ Cue finua rafuena raise uiñoñedicue, cue mare jitailla rafuena cue finoñena jira. Cue

gaiñena maraiñede rafuena finocabidicue.

¹⁶ Cue maraiñede finoacaiñega rafuena cue finoiade, Moisés micori llogacino marenana uiñoticue.

¹⁷ Cue comeci iena dama finoñede; iadedi cue comecimo ite jeacino cuena finotate.

¹⁸ Cue comecimo marecino iñede. Mare rafuena finoacadicue; iadedi iena finonidicue.

¹⁹ Cue mare finoacaga rafuena finoñedicue; iadedi cue maraiñede finoacaiñega rafuena finodicue.

²⁰ Cue finoacaiñega rafue cue finoiade, cue comeci iena dama finoñede; iadedi cue comecimo ite jeacino cuena iena finotate.

²¹ Biese cuemo suicabide. Mare rafuena cue finoacaniadedi, jeacinona finocabidicue.

²² Cue comeci Jusiñamui lloga uaina gaide;

²³ iadedi cue comecimo maraiñede rafuena il-lana uiñoticue. Cue comecina namataacade. Cuena jeacinona finotaiacade.

²⁴⁻²⁵ Eo dueredicue. Jusiñamui lloga uaina cue comecimona finoacadicue; iadedi cue comecimo ite maraiñede rafue cuena jeacinona finotaiacade. Jeacino finocana cue jaia, duere sefuiticue. Jusiñamui illanomo ico jaca iñeiticue. Naiemona jaca buna cuena jillobitañede. Dama Jusiñamui cuena jillotaite, cai Nama Jesucristo muidona. Ie jira Jusiñamuimo cue iobicabillasa.

8

Jusiñamui Joreño cai comeciaina namatacana cai jailla

¹ Cristo Jesús duidinodicaí. Ie jira Jusiñamuidi caina duere finoñeite.

² Jeacino anamo jai cai iñena jira, caina duere finoñeite. Jeacinona cai finuamona, Jusiñamui illanomo ico jaca iñeiticai. Duere sefuiticai; iadedi naiemona Jusiñamui Joreño caina jai jillotate. Jesucirstomo cai duillanona, caina jaca itataite.

³ Moisés micori llogacinona cai raise iñoñena jira, jeacinomona dani jillonidicai. Ie jira Jusiñamuidi ie Jitona orede, imana naimie jaillena. Cai isoi naimie jaide; iadedi naimiedi jeacinona finoñede. Jeacinona finorainidicai. Cai jeacino facaina fodaillena, naimiena orede. Naimie uaidi cai jeacinona anafefitate. Ie jira jeacino anamona jai caina jillotate.

⁴ Iese finode, cai marena illena, Moisés micori llogacino llua isoi. Ie jira cai comecimo ite maraiñede jitailla rafuedo jai jaiñedicai; iadedi Jusiñamui Joreño jitailla rafuedo jai jaidicai.

⁵ Cai comecimo ite maraiñede jitaillacinodo cai jaiadedi, naiemo cai comeciaina facadicai. Iena finodicai; iadedi Jusiñamui Joreño jitailla rafuedo cai jaiadedi, iemo cai comeciaina facadicai. Naimie jitailla rafuena finodicai.

⁶ Maraiñede jitaillicinomo comeciaina facacabidino Jusiñamui diga ico jaca iñeitimaci; iadedi Jusiñamui Joreño jitailla rafuedo jaidino Jusiñamui diga jaca iitimaci. Jiai jaca uri iitimaci.

⁷ Jiaino Jusiñamuina enoidimaci. Jusiñamui lloga uaina jitañeidimaci. Iena iñonidimaci.

⁸ Iese itino Jusiñamuina iobitanidimaci.

⁹ Iese iñedomoi; iadedi Jusiñamui Joreñomo jai duidomoi. Naimie omoimo ite. Bumo Jusiñamui Joreño iñenia, Cristomo nia duiñede.

10 Jeacinona omoi finua jira, fiodaitemoi; iadedi Cristo omoimo illa jira, omoi joreñuai Jusiñamui illanomo jaca iitimaci, Jusiñamui omoina marebi-caitaja jira.

11 Cristo Jesús fiodaillamona, Jusiñamuidi naimiena jillotate. Omoimo ie Joreño illa jira, omoi fiodaye, Jusiñamuidi ie Joreño uaido omoi abiana jiai jillotaite.

12 Cue amatiai, iese caimo suite. Ie jira cai comeciaino ite marañedicinodo cai jaiñelli.

13 Naicinodo cai jaiia, Jusiñamui illanomo ico jaca iñeiticai; iadedi Jusiñamui Joreñodi caina canuamona, naicino anamona cai jilluanona, Jusiñamui illanomo ico jaca iiticai.

14 Nana Jusiñamui Joreño namatadinodi Jusiñamui uruiiai.

15 Jusiñamui Joreña feiñoñedomoi, naimiena omoi jaciruillena; iadedi Jusiñamui uruiaina omoi jaillena, naimiena feiñotomoi. Duere sefuillacinona navui jaciruitomoi; iadedi birui: “Cai Moo” raillanona, Jusiñamuina uaidotomoi. Ie jira naimiena jai jaciruiñedomoi.

16 Cai comeciaina Jusiñamui Joreño uiñotajamona, cai comeciainona Jusiñamui uruiaidicaina jai uiñoticai.

17 Naimie uruiaidicaina jira, ie uruiaino fecaa-calle ra caimo jai duide, Cristomo jai duilla isoi. Naimie dibeimo cai illanona, Cristo isoi cai duere sefuilla jira, naimie isoi ie Moo illanomo ico iiticai.

18 Biena uiñoticue. Bene birui duere sefuidicai; iadedi iemo cai comeciaina cai facañena, monamo ico eo marena jaca cai illena jira.

19 Iese cai illemo nana Jusiñamui finoca radi iocire birui ocuridimaci.

20 Nana eniruemo ite Jusiñamui finoca radi mare; iadedi Adán micori jeacino finua jira, Jusiñamui llua jira, naimaci faidobidimaci. Iese suide; iadedi ico dane marena naimaci illemo ocuridimaci,

21 naimaci rifaillamona ico naimaci jillua jira. Ie mei Jusiñamui uruiaidicaina isoi marena iitimaci. Dane fodaiñeitimaci.

22 Biena uiñoticaí. Nana Jusiñamui finoca radi danomo eo duere sefuicana nia jaidimaci. Marena illemo nia ocuridimaci.

23 Dani naimaci duere sefuicana jaidimaci; iadedi jiaí duere sefuidicaí. Jusiñamuidi ie Joreño caimo fecaja jira, ico cai marena illena uiñoticaí. Monamo Jusiñamui uruiaina ico cai illemo ocuridicaí. Cai fodaia, fodaillamona cai abiaina jillotaite. Jiaífo eruaite cai abiaimo meidollemo ocuridicaí. Ie mei cai abiaí dane fodaiñeitimaci.

24 Naiemo cai ocurillamona, cai jeacinomona navui jillobidicaí. Bumo ie jitaille ra ia, iemo naimie ocuriñede. Ie feiñoñega ramo ocuride. Ie isoidemo ocuridicaí.

25 Caimo suiñede rafuemo cai ocurilla jira, iemo fecuise ocuridicaí.

26 Birui duere cai sefuia, ico marena cai illemo ocuridicaí. Jusiñamui Joreño caina jiaí canode. Jusiñamuimo cai jüia, naimiemo cai jicanua rafuena cai raise uiñoñenia, ie Joreño cai facaina ñaite. Naimiedi cai jino botanide uaina Jusiñamuimo llote.

27 Jusiñamui cai comeciaina uiñote. Naimie jitailacinona ie Joreño jüa jira, iena uiñote. Jusiñamui

cominidicai. Ie Joreño cai facaina ñaiana cacade.

Jusiñamui caina isiruite

²⁸ Jusiñamuina isiruitinodicai. Naimie jitailla jira, naimie caina fetode. Jusiñamuidi caimo suide rafuena marena suicana jaitate. Iena uiñoticai.

²⁹ Caina isiruillanona, caina fetode. Nano dofoconimona caina naimie Jito isoi cai illena itatate. Naimie Jitodi cai ama doforamiena.

³⁰ Caina iese jaie itatajamona, birui caina uaidote. Caina uaiduanona, caina jeacinona jaca finoñedino jai isoitate. Caina jeacinona jaca finoñedino jai isoitajamona, naimie illanomo ico cai ia, ebire iiticai.

³¹ Iese caina itataja jira, Jusiñamuidi cai facaina illa jira, bu cai facaina ñhellen, damamai iesedicai.

³² Jusiñamuidi ie Jitona duere sefuillamona jil-lotañede; iadedi namie jitailla jira, cai facaina ie Jitona orede, cairi fodaillena. Ie muidona naimie dibeimo marena cai ille rafuena caimo jia iite.

³³ Jeacinona navui finodicai; iadedi Jusiñamuidi caina jeacinona jaca finoñedino jai isoitaja jira, Jusiñamui fetocanodicaina jira, jaca buna cai jeacino facaina naimiemo llogidoñeite.

³⁴ Ie jira cai jeacino facaina jaca buna caina duere finotañeite. Cristo Jesús jaie fodaite; iadedi fodaillamona naimie jillode. Jusiñamui beicimo naimiedi birui ite. Cai facaina naimie ñaite.

³⁵ Cristo caina isiruite. Jaca buna Cristo caina isiruillacinona baironide. Jiaie comini duere caina finoa, caina jeare finoa, aime cai guia, cai ñiroinia, jacirede rafue caimo ia, jiaie comini caina meineia, Cristo caina nia isiruite.

36 Iena Jusiñamui facaina lloraima micori jaie cuega:

Jusiñamui muidona caina jaca meinetimaci, mer-
cadomo toica llaudaia fallena illa isoi
cuega.

37 Cristo caina isiruilla jira, caina naimie can-
uamona, naga bie isoide rafue caimo suia, cai
comeciai ocuiñocana cai jailla.

38 Jusiñamui caina isiruite. Naimiemona jaca
budi caina baironide. Cai fiodaia, cai nia ia,
Jusiñamui caina nia isiruite. Jusiñamui jaienisaídi,
Taifedi, Janabadi Jusiñamui isiruillacinomona
caina baironidimaci. Birui diga isoide rafue caimo
suide; iadedi Jusiñamui caina nia isiruite. Ico
diga isoide rafue caimo suia, Jusiñamui caina
nia jaca isiruite. Jaca buna ie uaido Jusiñamui
isiruillacinomona caina baironide.

39 Monamo ite radi Jusiñamui isiruillacinomona
caina baironide. Eniruemo ite radi Jusiñamui
isiruillacinomona caina baironide. Nana
Jusiñamui finoca radi Jusiñamui isiruillacinomona
caina baironide. Cai Nama Cristo Jesúmo cai duilla
jira, Jusiñamui caina isiruillana uiñotícaí.

9

Jusiñamuidi judíuaí raila comínina fetode

1-2 Jiaie rafuena nia lloiticue. Cue comecidi
eo sunaite. Cristomo cue duilla jira, tainona
lloñedicue. Jusiñamui Joreño cue comecina
uiñotajamona, iena uiñoticue. Cue comíniri
sunaiticue.

3 Cue comíní Cristo rafuena ñnoiacañedimaci.
Ie muidona Jusiñamui riicaillífue anamo birui

itimaci. Naiemona naimaci jilloillena, naimaci duere sefuillicino ifomo cue iticuedena, cuemona mare. Naimacidi cue amatiai.

⁴ Israel railla cominidimaci. Jiaicidi judúuai railla cominidimaci. Jusiñamuidi naimacina fetode, ie uruiaina. Jusiñamui siño finoca rafuena cioidimaci. Iena naimaci inollena, Moisés micorimo Jusiñamuidi rafuena jiai llote. Naimiena sedallena jiai llote. Naimaci dine naimaci jilloitaraimana oretallena jiai llote.

⁵ Naimaci jaiagaidi Abraham micori, Isaac micori, Jacob micori. Naimacimona comuide nairaimona Cristodí comuide. Naimiedi Jusiñamui. Nana rana naimie anamo ite. Naimieri jaca cai iobicabillasa. Iena jitaidicue.

⁶ Cai cominimo Jusiñamuidi ie uaina llote; iadedi nana cai comini iena inoñena jira: “Jusiñamui ie lloga uaina finoñede” raiñeiticai. Jusiñamuina naimaci raise inoñena muidona, nana Israel micorimona comuide cominidi Jusiñamuimo duiñedimaci.

⁷ Nana Abraham micorimona comuidinodi naimiemo duiñedimaci. Jusiñamui iena jaie llote: “Dama Isaacmona comuidinodi ua Abraham uruai”.

⁸ Naie lluamona nana Abraham micorimona comuidinona ie uruaiñenana uiñoticaí. Jusiñamui lloga uaina inotinodi naimie ua uruai.

⁹ Jusiñamuidi Abraham micorimo jaie llote: “Jiaie año bie facaiseconi o dine abido biiticue. Naie facaiseconi o ai Saradi jítóna jocoite” llote. Ie mei iese suide.

¹⁰ Ie mei Isaac micoridi Rebeca micorina ote, naimie aina. Ie mei naiñaiño micoridi gorasana

iaimaia micorina jocode. Nano doforamiedi Esau micori. Jaiamiedi Jacob micori.

11-13 Naiñaiño micori nia jocoñenia, Jusiñamuidi naiñaiño micorimo llote: “Nano doforamie ie ama anamo jaca iite” llote. Jusiñamui facaina lloraíma micori Jusiñamui lluaña jiaí cuete: “Jusiñamui llote: ‘Jacobna eo isiruiticue; iadedi Esauña janore isiruiticue’ llote”. Naie iaimaia micori nia jeciñenia, iaimaia micori marecinona nia finoñenia, iaimaia micori marañedicinona nia finoñenia, Jusiñamuidi iaimaia micorina iese llote. Ie finoca rafuemoná Jacob micorina fetoñede; iadedi Jusiñamui jitailla jira, Jacob micorina fetode.

14 “Jusiñamuidi dama Jacob micorina fetuana marañede” raiñeiticai. Jusiñamuidi marañedicinona jaca finoñede.

15 Jusiñamui bie isoide rafuena Moisés micorimo llote: “Cue dinena cue jitaillanona duenaiticue; ia cue dinena cue jitañenanona duenaiñeiticue” llote.

16 Comini naimiena jitaillamona, Jusiñamui naimacina duenaiñede. Naimaci rafue finuamona, naimacina duenaiñede; iadedi naimie jitailla jira, naimacina duenaite.

17 Jusiñamuidi bie isoide rafuena Faraón micorimo llote. Moisés micori illa facaise Egipto railla enirue illaimadi Faraón micori. Naimiemo llote: “Ona illaimana jai itataticue. O uicomo siño rafuena finodicue, cue uai siñonana jiaie comini uiñollena, nana cominido cue mameci sorillena”.

18 Jusiñamui iese ite. Naimie dinena ie jitaillanona duenaite. Naimie jitailla jira, jiaie cominina naimiena ñnotañede.

19 Nibai comeciaina facadomoi: “Cominina iese Jusiñamui itataia, ¿bue ñellena naimacina duere finoacade?”

20-21 Iese comeciaina facañeno. ¿Ñiese nainona naimiemo ducaïtomoi? Ero, jiñoramona nogona finodiñaiñodi ie jitailla dierise nogona finode. Dajerie ebirede nogona finode. Dajerie jamai nogona finode.

22 Ie isoide. Nana comini dajena eruaiñedicaï. Ie jitailla isoi, jiaïforie Jusiñamui caina comuitate. Jusiñamui ie jitailla rafuena finode. Jeacinona comini finua jira, Jusiñamuidi naimacina duere finoacade. Naimacina ie uai siñonana jiaï uiñotaacade; iadedi naimacina nia duere finoñede.

23 Cominina Jusiñamuidi jiaï duenaila jira, naimacina ie siño uai ebirenana uiñotaacade. Naimie illanomo nanomona naimaci marena iitimaci. Iese naimie naimacina itatate.

24 Jusiñamui caina iese itatate. Da judíuaina iese itatañede; ie iadedi judíuainedonona jiaï iese itatate.

25 Jusiñamui iena jaie lluana Oseas micori jaie cuete:

Cue cominiñedinodi cue cominina jaitimaci.
Isiruiñeganona isiruiticue.

26 Dane jiaï cuete:

Navui cue cominiñedomoi; iadedi jiaie comini omoïna ico lloitimaci: “Naimacidi jaca cajede cai Jusiñamui ie uruiaïdimaci” lloitimaci

cuete.

27 Isaías micori raila lloraima jaie cuete: “Monailai fuemo conillie eo ite. Ie isoi Israel micori uruiaï eo jebuitimaci; iadedi Jusiñamuidi nana naimacina jillobitañeite. Dajeriena jillotajanona,

28 jia inomo ie lloga uaina raire finoite. Naimacina duere finoite” cuete.

29 Isaías micori jiai cuete:

Jusiñamuidi anamo nana ra ite.

Jusiñamuidi Sodómamo ite comini micoriaina jaie cuenode.

Gomórramo ite comini micoriaina jiai jaie cuenode. Naimaci micoriai isoi iñedicaí, nana cai cominina naimiedi duere finoñena jira.

Judíuaidi Cristo rafuena jitañedimaci

30 Biemo comeciaina faca. Judíuainñedinodi Jusiñamui jitailla isoi, marena illana navui uiñoiacaiñedimaci; iadedi iena jai uiñotimaci. Jesucristona naimaci ñnuamona, marena illana jai uiñotimaci.

31 Jusiñamui jitailla isoi marena naimaci illena, judíuaidi Moisés micori llogacinodo jaidimaci; iadedi Moisés micori llogacinona naimaci raise ñnoñena jira, marena illana jaca uiñoñedimaci.

32 Naimaci finoca rafuemonona marena iacadimaci. Marena naimaci illena, Jesucristona ñnoiacaíñedimaci. Naimie muidona marena iñeitimaci.

33 Isaías micori iena jaie cuete: Jusiñamui llote: “Ero, Jerusalémo cue Jitona ore-taiticue.

Naimie muidona cominidi jilloñeitimaci.

Naimiena naimaci ñnoñenia, faifitimaci; iadedi naimiena ñnotinodi tainona ñnoñeitimaci. Suubicaiñeitimaci” llote.

10

1 Cue amatiai, judíuai comini jilluana eo jitaídicue. Jusiñamui diga cue ñaia, iena jicadícue.

² Jusiñamui jitaillacinona eo finoacadimaci. Iena uiñoticue. Iena finoacadimaci; iadedi iena finuana raise uiñoñedimaci.

³ Jusiñamui naimacina marena itatallena uiñoñedimaci. Naimaci finoca rafuemona marena iacadimaci. Jusiñamui llua isoi jaiacaiñedimaci.

⁴ Nana Cristona ñnotimiedi Moisés micori llogacinodo naimie marena illena jai jaiñede. Cristona ñnuamona, Jusiñamui jitailla isoi, naimie marena jai ite.

⁵ Moisés micori jaie cuete: “Naimie marena illena, cue lluado jaidimiedi jaca iite, cue lluana naimie raise ñnoia” cuete.

⁶ Iese jaie cuete; iadedi jaca buna iese ñnoñede. Cristona ñnuamona, marena Jusiñamui jitailla isoi, birui iticai. Jusiñamui uai llote: “Omoi comeciaina facañeno: ‘Cristona cai baillena, naimiena bene cai atillena, monamo jaiticai.

⁷ Fiodaitino dine jaiticai, Cristona cai jillotalena’. Iese comeciaina facañeno” llote. Cristodi eniruemo jaie bite. Fiodaite; ia naiemona jai jillode.

⁸ Jusiñamui uai llote: “Naie rafue cai dine jai ite. Iena jai uiñoticaí”. Cai jilloillena Cristona cai ñnuana birui lloticai.

⁹ Jaie cominimo: “Cristodi cai Nama” omoi lloia, Cristo fiodaillamona Jusiñamui naimie jillotajana omoi ñnoia, jilloitomoí.

¹⁰ Cai comecimona cai ñnua jira, Jusiñamui caina marena illana itataite. “Cristodi cai Nama” cai lloia, Jusiñamui caina jillotaite.

¹¹ Isaías micori iena jaie cuete: “Cristona ñnotinodi tainona ñnoñeitimaci. Suubi-caiñeitimaci” cuega.

12 Naie rafuedi nana cominina ñaite. Judíuaina ñaite. Judíuaiñedinona jiai ñaite. Jusiñamui anamo nana cominidi itimaci. Nana naimiemo jıcanotinona jaca duenaite.

13 Cristodi naga naimiemo jıcanotimiena jil-lotaite;

14 iadedi Cristona naimaci nia ñnoñenia, naimiemo jıcanonidimaci. Cristo naimaci facaina fiodailla rafuena naimaci nia cacaiñenia, naimiena ñnonidimaci. Naimacimo naie rafuena jıaie comini lloñenia, iena cacaiñeitimaci.

15 Jusiñamui ie rafue llorainina jai orede. Isaías micori iena jaie cuete: “Mare rafuena llotino cai dine billano, eo iobidıcai” cuete.

16 Iese cuete; iadedi ailluena comini naie rafuena nia jıtaiñedimaci. Isaías micori iena jıaie jaie cuete: “Jusiñamui, ailluena comini cai llwana ñnoiacaıñedimaci” cuete.

17 Cai llwamona Cristo rafuena cacadimaci. Cristo rafuena cacajamona, damıerie naimiena ñnotimaci.

18 Judíuai comini naie rafuena jai cacadimaci. Jusiñamui facaina lloraima micori iena jaie cuete: Naga enıruemo ite cominimo Jusiñamui lloraini micoriaıdi naie rafuena jai llotimaci cuete.

19 Judíuai comini naie rafuena cacadimaci; iadedi iena ñnoñedimaci. Moisés micori iena jaie cuete:

Jusiñamuidi llote: “Cue rafuena naimaci feiñua jira, judíuaiñedıno dıga uradoitomoı.

‘Naimaci abina uiñoñedimaci’ raitomoı;

iadedi cue rafuena naimaci feiñua jira, naimaci dıga iciritomoı” llote.

20 Isaías micori marefodo jıaie cuete:

Jusiñamui llote: “Cuena jenoñedino cuena jai baitimaci.

Naimacina cue jilloitallena cuena jicanoñedinomo jai bairedicue” llote.

²¹ Jusiñamui judíuái cominina jiaí llote: “Naimacina cue dine jaca uaidoticue; iadedi ñnoiacañedimaci. Cuena jitaiñedimaci” llote.

11

Judíuái cominimona dajerie ñnoitimaci

¹ Jusiñamuidi judíuaina fañonocaillamo omoi comeciaina facañeno. Judío imiedicue. Abraham uruiai micoriaimona comuidicue. Benjamín railla nairai imiedicue.

² Naimacina jaie naimie fetua jira, Jusiñamui judíuaina fañonocaiñede. Elíamo jaie ite rafuena uiñotomoi. Jusiñamuimo naimiedi judíuaina llote:

³ “Cue Nama, o facaina lloraini micoriaina meinetimaci. Ona cai sedajanona judaidimaci. Dama cue fiebidicue. Cuena jiaí meinea-cadimaci”.

⁴ Jusiñamui dinena uai ote: “Dama iñedio. Siete mil iñiaí cue dibeimo nia eenoticue. Baal railla jiraraina jaca sedañedimaci. Cuena nia sedadimaci” llote.

⁵ Birui ie isoide. Naimacina duenaillamona, naimacina Jusiñamui fetua jira, dajerie Jusiñamui dibeimo itimaci.

⁶ Naimacina duenaillamona, naimacina fetode. Naimaci finoca rafue muidona naimacina fetoñede. Naimaci finoca rafue muidona naimacina fetodena, naimacina duenaillamona naimacina fetoñede.

7 Ie jira iena iese lloiticue. Ailluena judíuaidi marena Jusiñamui jitailla isoi illana oñedimaci; iadedi Jusiñamui fetocano iena otimaci. Ailluena comini iena ñinoiacañedimaci.

8 Jusiñamui facaina lloraini micoriai iena jaie cuega: “Jusiñamuidi naimacina abina uiñoñafede. Jusiñamui finoca rana naimaci cioia, iena uiñoñedimaci. Jusiñamui rafuena naimaci cacajia, iena cacañedimaci. Birui iese nia itimaci” cuega.

9 David micori iena jiaí llote:

Naimacimo aillue ra illamona, Jusiñamui naimacina duere finoite.

10 Naimaci comeciai Jusiñamui rafuena uiñoñeitimaci.

Naimaci finoca rafue anamo duere sefuicana jaca jaitimaci.

Judíuainñedinomona dajerie ñnoitimaci

11 Naimie rafuena judíuai comini jitaiñena jira, Jusiñamui naimacina duere finode; iadedi naimacina sofeñede. Jusiñamuina judíuai ñnoñena jira, Jusiñamuidi judíuainñedinona jai jillotate. Naimacina jai jillotate, judíuai dinena judíuainñedinona uradoillena. Uradoillamona Jusiñamuidi naimaci naimiena ñnollena jitaide.

12 Cristona judíuai jitaiñena jira, Jusiñamuimona judíuainñedinodi diga marecinona birui feiñotimaci. Cristo dibeimo ico judíuai ia, Jusiñamuimona judíuainñedino ailluena feiñoitimaci.

13 Judíuainñedino, omoimo rafuena lloiacadicue. Omoi dine Jusiñamuidi cuena orede. Cue maijari eo marena ñaiticue,

14 cue comini cuena uradoillena, Cristona dajerie ñnotallena.

15 Cristona naimaci nia ñnoñena jira, judíuainedino jai ñnotimaci. Cristona ico judíuai ñnoia, Jusiñamui diga jaca iitimaci.

16 Janore jisa juilliruñu marenia, nana juilliruaidi mare. Riara ie jainauai marenia, nana ie igailai mare. Judíuaidi ie isoidimaci. Naimaci jaiagai micoriai jainauai isoidimaci. Naimaci jaiagai marenia, naimacidi jiai mare. Birui ite judíuaidi igailai isoidimaci.

17 Taide igailaidi ie amenamo jai duiñede. Ie isoidimaci. Naimacimona Cristona jiaño ñnoñena jira, Cristomo jai duiñedimaci. Sotaca riara isoi, naimaci ifomo itomoi. Ie jira Jusiñamuimona rafuena jai feñocabitomoi.

18 Naimaci ifomo omoi illa jira, abina uradoiñeno. Igailaimona jinao cajellena, ie ijina oñede; iadedi iemo duilla jira, jinaomona igailai cajellena, ie ijina ote. Ie isoide. Naimiemo omoi duilla jira, Jusiñamuimona rafuena jai feñocabitomoi.

19 Comeciaina facadomoi: “Taide igailai ifomo iticai isoidicai. Jusiñamui judíuaina oni dotade, caina fetollena”.

20 Uanaicinona comeciaina facadomoi. Naimaci ñnoñena jira, Jusiñamuidi naimacina oni dotade. Omoi ñnua jira, naimaci ifomo itomoi. Ie jira abina uradoiñeno; iadedi Jusiñamuina omoi jacirui.

21 Naimiena naimaci ñnoñena jira, judíuaina duere finode. Naimiena omoi ñnoñenia, daje isoi omoina duere finoite.

22 Biemo comeciaina faca. Naimiena ñnoñedinona jai duere finode; iadedi omoina duenaite. Naimiena ñnocana omoi jaia, naimie

omoi na duenaite. Iese omoi jaiñenia, naimie omoina dotaite.

²³ Judíuai Cristona ñnoñeno navui jaidimaci: iadedi Cristona naimaci birui ñnoia, naimie ñibeimo Jusiñamui naimacina itatarede, igai riaramo sotaja isoi.

²⁴ Ailli riarana cueticue. Naie amenamo nano duiñedomoi. Judíuai nainomo nano duidimaci. Jusiñamui jitailla jira, sotaca igai isoi, naimaci ifomo omoina jai itatate. Ie jira Jusiñamui jitaia, nainomo nano naimaci duilla jira, naimiedi judíuaina abido oite.

Eo ailluena judíuai jilloitimaci

²⁵ Bie rafuena omoi uñuana jitaidicue. Iena navui uñoñedicai. “Judíuai baifemo faiticai” omoi raiñellena, buena omoi mo lloticue. Diga judíuai Cristona birui ñnoiacaiñedimaci. Jusiñamui jitailla ñiese judíuaiñedino jillua facaisena, iese iitimaci.

²⁶ Ie mei eo ailluena judíuai jilloitimaci. Jusiñamui facaina lloraini micoriai iena cuetimaci: Jerusalémona cai Jilloitaraima biite.

Jacob micori uruiaimona jeacinona dotaite.

²⁷ Naimaci jeacinona oni dotajanona, Jusiñamui jaie lloga uai suite.

²⁸ Cristona birui ñnoiacaiñedimaci. Jusiñamuina enoidimaci. Jusiñamuina naimaci jitañena jira, naimie omoina fetode. Ie jira jillodomo; iadedi Jusiñamuidi judíuaina nano jaie fetode. Naimaci jaiagai micoriaimo ie lloga uaina jira, naimacina nia isiruite.

²⁹ Jusiñamui ie lloga uaina saiñede. Naimacina fetua jira, naimacina fainonocaiñeite.

³⁰ Jusiñamuina navui ñnoñedomoi; iadedi Jusiñamuina naimaci ñnoñena jira, Jusiñamui omoïna jai duenaite.

³¹ Jusiñamuina jai ñnoñedimaci; iadedi omoïna naimie duenaila isoi, Jusiñamuidi naimacina ico jiai duenaite.

³² Jusiñamui nana cominina naimiena ñnoñenana uiñotade, naimacina naimie duenailena.

³³ Jusiñamui caïna eo duenaite. Eo abina uiñote. Naga rana uiñote; ie iadedi naimie lloga uaina raise cacaiñedicai. Naimie finoca rafuena raise jiai uiñoñedicai.

³⁴ Jusiñamui facaina lloraïma micori iena jaie cuete: “Jaca buna cai Nama Jusiñamui comeci facajacinona uiñoñede. Jaca buna naimiemo ie finoca rafuena lloñede.

³⁵ Jiaïruido ïbana feiñollena, jaca buna naimiemo rana fecañede” cuete.

³⁶ Naga ra naimiemo illa jira, naga ra naimiemon bite. Naga rana finode. Naimiemo iobillacinona cai fecacabillasa. Iena jitaidicue.

12

Jusiñamui anamo raise omoï i

¹ Cue amatiai, omoïmo bie rafuena lloiticue. Jusiñamui caïna duenaila jira, omoï jeanide comeciaïmona, naimie jitaille rafuena omoï finuamona naimie anamo raise omoï i. Naimie jitailla isoi omoï i. Naimiedi omoï iese illana gaide. Omoï comeciaïmona naimiena raise omoï seda.

² Cristona uiñoñedino isoi omoï iñeno; iadedi omoï comeciai iuaina meiduanona, jiaie rafuedo mai omoï jai. Ie mei Jusiñamui jitailla rafuena

finuana uiñoitomoi. Mare rafuena finuana uiñoitomoi. Naimiena iobitajacinona jiai uiñoitomoi. Eo mare rafuedo jaillana uiñoitomoi.

³ Jusiñamui cuena duenaillamona, bie rafuena omoimo cue lollena, naimie uai cuemo ite. “Jiaie comini baifemo faiticue” raillamo o comecina facañeno; iadedi: “Nie isoidimiedicue” o raillamo o comecina raise faca. Jusiñamuimona o feiñoga diese iinuacinomo o comecina faca.

⁴ Nagamie ie abimo diga ra ite. Ie onolli ite. Ie uisi ite. Ie jebe ite. Diga jiaie ra ite. Rana cai finollena, naga ra cai abimo ite. Cai abimo jainaiaide.

⁵ Ie isoide. Cristona jai iinoticaí. Aillosiedicaí; iadedi daajena naimiemo jainaiaidicaí. Dani caimo jiai jainaiaidicaí.

⁶ Jusiñamuidi daje isoide uaina naimie dibeimo cai maijillena, caimo fecañede. Ie jitailla diese caimo fecade. Ie jira omoi feiñoga uaido naimie facaina maiji. Rafuena omoimo Jusiñamui lloia, iena raise llono. Roracomo omoi maijillena Jusiñamui lloia, nainomo raise maiji. Omoi llofuellena Jusiñamui lloia, naimie rafuena raise llofue.

⁷ Roracomo maijiacinona uiñotimiedi nainomo raise maijia. Llofuiacinona uiñotimiedi raise llofua.

⁸ Comeci ocuiñotajacinona uiñotimiedi comini comeциаina ocuiñotacana jailla. Rana fecajacinona uiñotimiedi rana caidiñeno fecaja. Cominina sedajacinona uiñotimiedi cominina raise sedaja. Dueredinona canodimiedi dueredinona iocire canua. Cristomo daajena cai jainaiailamona, iese coninina canocana jaiticaí.

Cristo rafuedo cai jailla

⁹ Omoï comeciãmona nana cominina isirui. Maraiñedinona gaiñeno; iadedi mare rafuedo omoï jai.

¹⁰ Coninina isirui, omoï cominina omoï isiruilla isoi. Omoïna jiaimie nia iobitañenia, naimiena raire omoï iobita.

¹¹ Cristo rafuena sefuiruiñeno finocana omoï jai. Cai Namana iocire seda.

¹² Naimie dine omoï illemo iocire omoï ocuiri. Duere omoï sefua, omoï comeciãna ocuiño. Jusiñamui diga ñaicabillanona omoï jai.

¹³ Jiaie creyentiaï rania, naimacina cano. Omoï jofuemo creyentiaï ria, naimacina nafue.

¹⁴ Jusiñamui dibeimo naimaci marena illena, omoïna duere finodinona Jusiñamuimo jii. Naimaciri marena ñaino. Naimacina faidoñeno.

¹⁵ Iobidino diga omoï nabairillena, omoï iobi. Sunaitino diga omoï nabairillena jiaï omoï sunai.

¹⁶ Daje isoi omoï comeciãï lloillamona uri omoï i. Abina birioicaiñeno. Jamai bue isoidino diga nabairi. “Jiaie comini baifemo uiñoticaï” raiñeno.

¹⁷ Jiaie comini omoïna jeare finoia, naimacina daje isoi jeare finoñeno. Ibana oñeno. Omoï marena illana jiaie comini uiñollena, marena omoï i.

¹⁸ Omoïmona rafuena suiñoñeno. Nana comini diga uri omoï i.

¹⁹ Cue isiruigano, bu omoïna jeare finoia, ibana oñeno. Jusiñamui naimacina duere finoite. Moisés micori iena jaie cuete: “Cai Nama llote: ‘Cominina duere finodicue. Ibana oiticue’ ” cuete.

²⁰ Ibana oñeno. Jusiñamui facaina lloraïma iena jaie jiaï ciega: “Omoï enoigamie aimetaia,

naimiena eca. Naimie jiroiacania, naimiena jirote”. Ie mei naimie meire omoimo eruaite.

²¹ Jiaie comini omoina jeare finoia, iciriñeno; iadedi naimacimo mare rafuena fino. Iese omoi finoia, naimacina omoi dibeimo itataitomoí.

13

¹ Nana illaicomini naimaci ifomo Jusiñamuidi itataja jira, illaicomini lloga uaina nana cai inua.

² Illaicomini uaina bu inoñenia, Jusiñamuina jiai inoñede. Ie mei Jusiñamui naimiena duere finoite.

³ Mare rafuena finodinodi illaicomini jaciruiñedimaci; iadedi marañede rafuena finodino naimacina jaciruitimaci. Omoina duere finoñellena, mare rafuena finocana omoi jai. Iese omoi jai, omoina marena ñaitimaci.

⁴ Jusiñamui facaina omoina canodimaci. Marañede rafuena omoi finoia, naimacina jacirui. Omoina duere finollena, naimacimo uai ite. Marañede rafuena finodimiena Jusiñamui facaina duere finoitimaci.

⁵ Ie jira naimaci uaina ino, Jusiñamuimona omoi duere sefuiñellena. Omoina: “Mare” jiai raitimaci.

⁶ Gobierno omoina ibataia, Jusiñamui facaina naimaci maijia jira, iena iba. Naimaci raise maijillena, iena iba.

⁷ Gobierno omoina ibataia, iena iba. Illaicominimo iobillacinona feca.

⁸ Ra omoi oia, ibañeno jaiñeno; iadedi conini omoi isirui. Jiaie comini isiruitimiedi nana Jusiñamui lloga uaina jai finode.

⁹ Moisés micori diga lletarafuena jaiete: “O añede riño diga iñeno. O iniñede iima diga iñeno. Jiaimiena meineñeno. Rana fiñeno. Jiaimimo ite

rana nicidoñoeno” cuete. Jiai lletarafue ite: “Dani omoi abiaina omoi isiruilla isoi, jiaie cominina omoi isiruilla”. Bie lletarafuena omoi ñnoia, nana lletarafuena jai ñnotomoi.

¹⁰ Jiaie cominina omoi isiruia, naimacina jeare jai finoñedomoi. Jiaie cominina omoi isiruia, nana Jusifamui lloga uaina jai ñnotomoi.

¹¹ Iena birui cai finua. Jesucristo billiruidi iairei jai ite. Naimiena cai nano ñnua facaiseconi, naimie billiruimo cai comeciaina facadica; iadedi nagarui naimie billirui iairei iñoicaide.

¹² Jesucristo nia dane biñena jira, eniruemo cai illa jira, jitreñonomo itica; isoidica; Naimie bia, naimie diga cai illemona, useredonomo raire ja iitica; isoitica; Ie jira jeacinona finocana cai jail-lana mai cai fainonocailli. Jesucristo rafue anamo raise cai illesa.

¹³ Cai marena illana nana comini uñollena, mare rafuena finocana cai jailla. Jearede rafuena cai finoñena. Cai jifaiñena. Cai aiñede riño diga cai iñena. Cai furiñena. Cai abina uradoiñena.

¹⁴ Iese cai iñena; iadedi naimie caina namatal-lena, cai Nama Jesucristona raise cai nabailli. Cai jearede navui jitaillacinona finoacanamo cai comeciaina facañena.

14

Jiaie creyentena jeare ñañeno

¹ Cristona ñnotimiena omoi dine biade, naimiena raise feiño. Naimie Cristona nia raise ñnoñenia, naimiena nafue; iadedi omoi isoi naimie ñnoñenia, conima uina caitañoeno.

2 Dajerie naga rana guitimaci; iadedi jiaimie difai guiga rana guite. Naimie riñede. Ie comecina facade: “Cue riia, jeacinona jai finoiticue”.

3 Naga rana guiñedimiena miñeno. Naga rana guitimiena miñeno. Jusiñamuidi naimacina jai feiñote. Ie jira miñeno.

4 Omoi facaina maijiñedimaci. Jusiñamui facaina maijidimaci. Jeacinona naimaci finoia, Jusiñamui naimacina duere finoite. Jeacinona finoi rail-lanona, Jusiñamuidi naimacina canoite.

5 Dajerie creyentiai comeciaina facadimaci: “Judíuai rafue finuaruillai Jesuñamuina sedajiticaí, nairuillai jiaruillai baífemo uaila jira”. Jiaíno raitimaci: “Nagarui daje isoide” raitimaci. Nagamie ie comecina raise facajamona,

6 cai Namana iobitallena, nagamie ie jitaillaruido cai Namana sedaite. Naga rana guitimie iobillacinona Jusiñamuimo fecajano, cai Namana iobitate. Naga rana guiñedimie iobillacinona Jusiñamuimo fecajano, cai Namana jiai iobitate.

7 Cristomo cai duilla jira, daní cai jitailla rafuena finonidicaí. Cai fiodailliruina jiai llonidicaí.

8 Naimiedi cai finolle rafuena ocuide. Cai fiodailliruina jiai lloite. Naimiemo cai duilla jira, iese iticaí.

9 Cristodi fiodaite. Ie mei jillode. Ie jira naimie anamo iticaí. Cai cajenia, naimie anamo iticaí. Cai fiodaia, naimie anamo jiai iiticaí.

10 Naimie baífemo omoi iñena jira, jiaie creyentena miñeno. Naimie uaina caitaño. Naimiedi Cristo díbeimo ite. Jusiñamui uicomo nana íco iiticaí. Jusiñamuidi maraiñedinona duere finoite. Maredinona duere finoñeite.

11 Isaías micorí jaie iena cuete:
Jusiñamuidí llote:

“Cue jaca illa jira, nana cominí cue uicomo
cuena sedajanona, cuemo iobillacinona fe-
caitimaci” llote.

12 Nainomo Jusiñamuimo nana cai finouiga ra-
fuenta lloiticai. Ie jira jiaie creyentiaí diga marena
omoi i.

*Jiaie creyentena jeacino finoí raillano, mare ra-
fuedo cai jailla*

13 Ie jira jiaie cominina cai miñena; iadedí mare
rafuedo cai jailla. Jiaimiena jeacinona cai finotai
raillano, mare rafuedo cai jailla.

14 Cai Nama Jesúmo cue duilla jira, naga riga
radi cuemona mare. Iena raise uiñoticue. Iena
cue riia, jeacinona finoñedicue. Iena uiñoticue;
iadedí jiaimie comecina facade: “Biena cue
riia, jeacinona jai finodicue”. Naimie comecina
iese facajamona, iena naimie riia, naimiemona
jeacinona jai finode.

15 O riga ra muidona jiaie creyente comeci
marañeno jaia, naimiena jai isiruiñedio. Cristo
naimieri fodaite. Ie jira naie isoide rana riñeno,
naimiena Jusiñamuina fainonocaitañellena.

16 Ie jira o jitailla rana finoñeno. Jiaie cominí ona
miñellena, naie rana riñeno.

17 Jusiñamui cominina cai illamona, cai guille
ramo cai comeciaina cai eo facañena; iadedí
marena cai illamo cai comeciaina cai facaja. Uri
cai illamo cai comeciaina jiai cai facaja. Iocire
cai illamo cai comeciaina jiai cai facaja. Jusiñamui
Joreño caimo illa jira, iese caina itataite.

18 Iese cai jaia, Cristona raise sedadicaí. Jusiñamuina iobitadicaí. Jiaie comini caina marena jiai ñaitimaci.

19 Ie jira uri icana cai jailla. Dani cai comeciaina ocuiñocana cai jailla.

20 Omoi riacaga ra muidona, jiaie cominina Jusiñamuina fañonocaitaño. Naga radi mare, rillena; iadedi bue isoide omoi ria muidona, jiaimie Jusiñamuina fañonocaia, jeacina jai finodomoí.

21 Bue isoide omoi ria muidona, jiaimie jeacino finoi raillanona, iena riño. Bue isoide omoi jirua muidona, jiaimie jeacino finoi raillanona, iena jiroño. Bue isoide omoi finua muidona, jiaimie jeacino finoi raillanona, ie isoide omoi finoño. Naimiedi Cristomo jai duide.

22 Mare ra omoi finoia, omoi comeciainona iena uiñotomoí. Jusiñamuidi omoi comeciaina uiñua jira, iena marefodo lloño. Omoi comeciainona jeacina omoi finoñenana uiñotomoí. Ie jira iocire itomoí.

23 “Ñie isoide ra cue ria, jeacina finodicue” raillanomo bu iese comeciina facaia, iena naimie riña. Iena naimie ria, Cristona naimie raise ñnoña jira, jeacina jai finode. Jiaimiena jeacina cai finotai raillano, mare rafuedo cai jailla.

15

Jiaie creyentena cai canua

1 Cristo rafuedo raise jaidicaí; iadedi jiaino Cristo rafuedo cai isoi nia jaiñedimaci. Naimacina

cai canua. Ie jira dani cai jitaille rafuena finoñeticai;

² iadedi Cristo rafuedo naimaci raise jaillena, jiaie cominimo cai comeciaina cai facaja, naimacina cai canollena.

³ Eniruemo navui naimie ia, Cristo ie jitailla rafuena jiai finoñede; iadedi Jusiñamui jitailla rafuena finode. Naimiedi duere sefuide. Jusiñamui facaina lloraima micori Cristo ñaiana jiai cuete: “Jusiñamuina jeare ñaiacadimacimo, cuena jiai jeare ñaitimaci” cuete.

⁴ Naiemona cai fueollena, naiemona cai comeciai ocuiñotallena, Jusiñamuina jaie ciegafuiaidi caimo ite. Naiemona Jusiñamui illanomo cai illemo ocuridicai.

⁵ Jusiñamui cai comeciaina ocuiñotade. Naimie coniniri omoina uri itatajana jitaidicue. Cristo Jesús llua isoi, omoi uri illana jitaidicue,

⁶ daje isoi omoi comeciai lloillamona, Jusiñamuina omoi iobitallena. Cai Nama Jesucristo Moona Jusiñamui illamona, Jusiñamuina omoi iobitajana jitaidicue.

Judíuaiñedinodi Cristo rafuena jiai cacadimaci

⁷ Jiaie illanomona creyente omoi roracomo bia, Cristo caina feiñua isoi, Jusiñamuina iobitallena, naimiena raise omoi feiño.

⁸ Iena nia lloiticue. Judíuaina canollena, Jusiñamui lloga uaina fuidollena, Cristodi bite. Jusiñamui tainona lloñede. Jusiñamui naimaci jaiagai micoriaimo ico sulle rafuena jaie llote. Eniruemo billanona, Cristo iena fuiduaibite.

9 Judíuaiñedino Jusiñamuina iobitallena, Jusiñamui naimacina duenaila jira, Cristodi bite. David micori Cristo llwana jaie cuete:

Judíuaiñedino motomo cue illamona ona iobitaitimaci.

Ruamona cue muidona ona jiaí iobitaitimaci.

10 Moisés micori jiaí cuete:

Judíuaiñedino, Jusiñamuimo duide comini diga iobi.

11 David micori jiaí cuete:

Nana judíuaiñedino, Jusiñamuimo iobillacinona feca.

Nana comini naimiemo iobillacinona fecacabil-
lasa.

12 Isaías micori cuete:

Isaí micori uruiaimona damie comuitajamona, naimiedi judíuaiñedinona sedaite.

Naimie naimacina jillobitallena, naimiemo ocuiritimaci.

13 Jusiñamui iemo omoína ocuiritate. Naimiena omoi iinuanona, naimie omoína caimare itatajana jitaidicue. Uri itatajana jiaí jitaidicue. Iemei Jusiñamui Joreño naimie siño uai diga omoi jillu-amo omoína ocuiritate.

14 Cue amatiaí, omoína uiñoticue. Eo maredomoi. Cue lloga rafuena eo uiñotomoi. Coninina llofueredomoi.

15 Iena omoi comecillena, dafuerie rafuena omoimo marefodo cueticue. Jusiñamui cuena fetuanona, ie rafuena cue llollena, cuena orede.

16 Judíuaiñedinomo Jusiñamui ie mare rafuena cue llollena, Cristo Jesús facaina maijidicue. Jusiñamui dibeimo naimacina cue itatajanona, Jusiñamui naimacina feiñollena, naimacimo

lloiticue. Jusiñamui Joreñodi naimacina jiai maretaite.

¹⁷ Jusiñamui dibeimo cue maijia jira, Cristo Jesús muidona cue maijari iobidicue.

¹⁸ Cue maijiana marefodo lloiticue. Judíuaiñedinona Jusiñamuina ñnotallena, Cristodi cuena canode. Cue llwana cacadimaci. Cue illana ciodimaci.

¹⁹ Cristodi cuena siño rafuena finotate. Jusiñamui Joreño uaido cuena finotate. Iemei Cristona jai ñnotimaci. Jerusalémona Ilírico railla enrue dinomo Cristo ie mare rafuena ailluena cominimo raise jai lloiticue.

²⁰ Nainomo Cristona nia uiñoñedino dine navui cue jaiacana jira, nainomo Cristo rafuena lluidicue. Jai cacadino illanomo cue jaiacaiñena jira, nainomo lluaiñedicue.

²¹ Isaías micori buena jaie cuete:

Cristo rafuena nia cacaiñedinodi iena cacaitimaci. Naimiëna uiñoitimaci cuete.

Romamo Pablo jaiacade

²² Nainomo cue maijiacana jira, Romamo omoi dine nia jaiñedicue.

²³ Diga nairaimo Cristo rafuena bene jai cue llua jira, cue maijille bene jai ññede. Diga años omoi dine cue jaiacana jira.

²⁴ España mo cue jaia, omoi dine jaiticue. Omoi diga nano nigarui caimare ñaiticue. Ie mei España mo cue jaillena, cuena canoitomoi.

²⁵ Omoi dine jaiticue; iadedi Jerusalémo ite creyentiaina cue canollena, nainomo nano jaiticue.

²⁶ Macedoniam o ite creyentiaidi ucubena ofitacimaci. Acayamo ite creyentiaidi ucubena jia ofitacimaci. Jerusalémo ite duerede creyentiaina canoacadimaci. Jerusalémo ite creyentiaina canollena, iena birui uiticue.

²⁷ Iena feacaadimaci. Judíuainedimaci; iadedi judíuaina canoacadimaci, naimacimo Cristo rafuena navui judíuai llua jira. Ie jira naimacina birui canodimaci.

²⁸ Naimacimo bie ucubena raise cue fecaja mei, Españamo cue jaillemona, omoi dine nano jaiticue.

²⁹ Omoi dine cue ria, naimie rafuena cue lollena, Cristo cuena raise canoite.

³⁰ Cue amatiaí, cai Nama Jesucristomo omoi duilla muidona, Jusiñamui Joreño coniniña omoína isiruitaja muidona, Jusiñamuimo omoi jiiia, cue facaina jiaí omoi jii.

³¹ Judeamo ite creyenteñedinomona cue jillobillena, Jerusalémo ite creyentiamo cue feaacalle ucubena naimaci raise feiñollena, cue facaina omoi jii.

³² Jusiñamui jitailla isoi omoi dine iocire cue rillena, iese omoi jii. Iemei omoi diga cue illemona, jafaicina oiticue.

³³ Jusiñamui omoína uri itatajana jitaidicue.

16

Romamo itinomo Pablodi ie uaina orede

¹ Febe raillañaiño omoi dine jaite. Naiñaiñoona omoi uiñuana jitaidicue. Naiñaiñodi creyente. Cencia railla nairai iñaiño. Cristo dibeimo maijiano, nainomo ite creyentiaina canocabide.

2 Cristomo omoi duilla muidona, jiaie creyentiaina cai feiñoiacacabilla isoi, naiñaiñoona raise feiño. Diga cominina naiñaiño canua jira, naiñaiño jitaille diese cano. Curna jiaí canode.

3 Priscila dine cue uaina oredicue. Naiñaiño ini Aquila dine cue uaina jiaí oredicue. Cristo Jesús facaina cue diga maijidiaimaiaí.

4 Cue facaina niadedi fiodaitiaimaiaí. Ie jira iaimaiairi iobidicue. Diga nairaimo judíuaifede creyentiaí itimaci. Cuemona Cristo rafuena cacadimaci. Cue facaina iaímaiaí niadedi fiodailla jira, iaimaiairi jiaí iobidimaci.

5 Iaímaiaí jofomo rollena bitino dine cue uaina oredicue. Epeneto dine cue uaina jiaí oredicue. Cue isiruigamie. Asia railla eniruemo itinomona naimiedi Cristona nano inotimie.

6 María dine cue uaina oredicue. Omoína canolena, omoi motomo maijide.

7 Andrónico dine cue uaina oredicue. Junias dine cue uaina oredicue. Naie iaímaiaídi cue comini. Cárcelmo danomo navui iticaí. Jesucristo oretaganodi iaímaiaína marena ñaitimaci. Naimiena nia cue inoñena facaise Cristona inotiaímaiaí.

8 Amplias dine cue uaina oredicue. Cristomo naimie duilla jira, naimiedi cue isiruigamie.

9 Urbano dine cue uaina oredicue. Cristo facaina cai diga maijicabide. Estaquis dine cue uaina oredicue. Cue isiruigamie.

10 Apeles dine cue uaina oredicue. Cristomona naimiedi mare rafuedo jaicabide. Aristóbulo jofomo itino dine cue uaina oredicue.

11 Herodión dine cue uaina oredicue. Naimiedi cue comini. Narciso cominimona dajerie inotimaci. Naimaci dine cue uaina oredicue.

12 Trifena ðine cue uaina oredicue. Trifosa ðine cue uaina oredicue. Cai Nama facaina maijidiiañuai. Pérsida ðine cue uaina oredicue. Cue isiruigañaiño. Cai Nama facaina eo maijide.

13 Rufo ðine cue uaina oredicue. Cai Namana eo raise ðnote. Naimie ei ðine cue uaina jiaí oredicue. Naiñaiñodi cue ei isoide.

14 Asíncrito ðine cue uaina oredicue. Flegonte ðine cue uaina oredicue. Hermas ðine cue uaina oredicue. Patrobas ðine cue uaina oredicue. Hermes ðine cue uaina oredicue. Naimaci illanomo ite creyentiaí ðine cue uaina oredicue.

15 Filólogo ðine cue uaina oredicue. Julia ðine cue uaina oredicue. Nereo ðine cue uaina oredicue. Naimie miriño ðine cue uaina oredicue. Olimpás ðine cue uaina oredicue. Nana naimaci illanomo ite creyentiaí ðine cue uaina oredicue.

16 Conini caimare omoi uaido. Diga nairaimo creyentiaí itimaci. Nana naimacidi omoi ðine naimaci uaina oredimaci.

17 Cue amatiaí, daje rafuena nia lloiticue. Omoi comeciaí daje isoi lloitañedino diga nabairiñeno. Uai uaitacabidino diga nabairiñeno. Omoi jai cacaja rafuena lloñedimaci; iadedi jiaie rafuena llotimaci. Naimaci diga nabairiñeno.

18 Cai Nama Jesucristo facaina maijiñedimaci; iadedi dani naimaci jitailla rana maijicabidimaci. Mare isoide llua mona abina raise uiñoñedinona jifuetimaci.

19 Ailluena cominidi Cristona omoi ðnuana uiñotimaci. Ieri iobidicue. Marecinona finuana raise omoi uiñuana jitaídicue. Marañedicinona omoi finuana jitaíñedicue.

20 Jusiñamuidi omoína uri itatate. Naimie omoína canoite, Taifena anafefitallena. Cai Nama

Jesucristo omoına duenaillesa.

²¹ Omoı dıne Timoteo ie uaina orede. Cue diga jıai maijıcabide. Lucio ie uaina jıai orede. Jasón ie uaina jıai orede. Sosıpater ie uaina jıai orede. Naimacıdı cue comını.

²² Terciodıcue. Pablo facaina bie cartana omoımo cuetıcue. Cai Namamo cue duilla jira, omoımo cue uaina oredıcue.

²³ Gayodı ie uaina jıai orede. Naimıe jofomo ricabıdıcue. Creyentıadı naimıe jofomo ro-cabıtımacı.

²⁴ Erasto ie uaina orede. Naimıedı bie nairıı ie ucube eenorııma. Cuarto ie uaina orede. Naimıedı jıai creyente.

Jusiñamımo iobıllacınona jaca caı fecajasa

²⁵ Cue mare rafue llua isoi, Jusiñamı omoı comecıına ocuiñotarede. Jesucristo rafuena llocabıtıcue. Jusiñamıdı comınımo naie rafuena jaie uiñotañede;

²⁶ iadedı Jusiñamı caına iena birui jai uiñotade. Nana comını iena uiñollena, Jusiñamı facaina llorını micorııı iena jaie cuetımacı. Jusiñamı llua jira, Cristona comını ñnollena, nana comınıdo bie rafuena llocana birui jaide. Jusiñamıdı jaca ite.

²⁷ Jusiñamıdı naga rana uiñote. Naimıemo Jesucristo mamecıdo iobıllacınona jaca caı fecajasa. Mai. Macıbaite. Pablodıcue.

**Jusiñamui uai: Jusiñamui jito rafue illa
rabenico**
**New Testament in Huitoto, Murui (PE:huu:Huitoto,
Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files dated 29 Jan 2022

145a1f66-dca1-5de3-9c00-4e533605e488